

04. maj 2015

Ingerlatseqatigiiffiit Kalaallit Nunaannilu oqartussaasut whistleblowereqarnissamut aqqis-suussinissamut (kinaassutsimik ersersitsisuunngitsumik ilisimasamik ingerlatitseeqqiisinnanermut periarfissiisumik) malittarisassiuunneqarnissaannut Naalackersuisut peqquneqarnissaannut Inatsisartut aalajangiiffigisassaattut siunnersuut.

(Inatsisartuni ilaasortaq Nauja H. Nathanielsen, Inuit Ataqatigiit)

Siumumiit inuiqatigiinni toqqissisimanartumik pissuserissaartumillu aammalu peqquserlunnertaqanngitsumik ingerlatsinissaq pingaartipparput, inuiaqatigiit ikittunnguugatta periarfissarititat naligiikannernissaat tamanut atuunnissaat naleqartipparput.

Qinikkatut nunami atorfiit qullersaanni inissisimaneq imaluunniit suliffeqarfimmi atorfiit qullersaaniikkaanni apeqqutaanani, pissaaneq akisussaaffilimmik unneqqarittumillu atugassaasoq kialluunniit assortorsinnaanngilaa. Immaqaluunniit appasinnerusumik atorfeqaraanni, assigiimmik ataqqinninneq piusariaqarpoq, unneqqasunnerlu nakkutilliinerit kukkunersiunerillu nalinginnaasut arajutsisinnaasaat qanoq iliuuseqarfiginissaanut periarfissaqassasoq, kinaassutsimik ersersittingikkaluarluni, nakkutilliinerup nukittorsarneqarnissaanik naliliilluta Siumumiit siunnersuut ilalernartipparput.

Whistleblowereqarnissamut aqqissuussinertut aamma peqquserlulluni iluanaarniarnerup akiorniarneqarnissaattut ittut, oqaatigisariaqarparput ajuusaanartuusoq ilaannikkut inuiaqatigiinni pisariaqartarsinnaanera. Taamaattoq nakkutilliinerit kukkunersiunerillu saniatigut periarfissiinerit imaattut peqquserlunnissanut pakkersimaarinnissinnaanerat aamma ilisimaaralugu, Naalackersuisut suliat imaattut aallartereerat aamma ilisimavarput.

Qujanarporlu inuiaqatigiit ingerlanneqarneranni unneqqarinnissaq pingaartillugu partiit sulimmata.

Siumumiit ilanngullugu una oqaatigisariaqarparput;

Ajusaanartumik peqquserlunneq imaluunniit ernumanarlunnartumik pisoqartartoq inunnik isumaginninnerup susassaarfiani, assersuutigalugu angajoqqaarsiat imaluunniit inunnik isumaginnerup kommuunini ingerlannerani, suliat ernumanarlunnartut nalaanneqartarput.

Ilanngullugu **kommuunini** whistlebloweritut ittunik periarfissiinissaq Naalakkersuisut suliaqaqquneqassasut Siumumiit siunnersuutigaarput.

Tassalu ilanngullugu Inunnik isumaginninnerup, socialip, susassaarfiani kinaassutsimik ersersitsisunngittumik ilisimasamik ingerlatitseeqqiisinaanermut periarfissiisumik Naalakkersuisut malit-tarisassiuunneqarnissaanut suliaqassasut.

Assersutigalugu Danmarkimi inunnik isumaginninnerup susassaarfiani kinaassutsimik ersersitsi-nani telefonnormumut aalajangersimasumut sianertoqarsinnaavoq, imaluunniit nittartakkakut immersugassaq aalajangersimasoq atorlugu ilisimasamik ingerlatitseqqittoqarsinnaavoq.

Taamaammat Siumumiit aappassaaneerpeqartinnagu ataatsimiititalianut marlunnut innersuupparput, tassalu Aningaasaqarnermut, Akileraaartarnermullu Ataatsimiititaliamut aammalu Ilaqutariinnermut Peqqissutsimullu Ataatsimiititalianut.

Jens Erik Kirkegaard

Siumut